

ԼԵԶՎԱԲԱՆՈՒԹՅՈՒՆ

ԼԱԼԻԿ ԽԱՉԱՏՐՅԱՆ

Խաչատուր Աբովյանի անվան ՀՊՄՀ հայոց լեզվի և նրա
դասավանդման մեթոդիկայի ամբիոնի պրոֆեսոր,
բանասիրական գիտությունների դոկտոր

ԼՈՒՍԻՆԵ ԵՆԳՈՅԱՆ

Խաչատուր Աբովյանի անվան ՀՊՄՀ հայոց լեզվի և նրա
դասավանդման մեթոդիկայի ամբիոնի հայցորդ
ՀՏԴ 811.19

ԲԱՌԱՅԻՆ-ՄԱՍՆԻԿԱՎՈՐ ԶՈՒԳԱԶԵՎՈՒԹՅՈՒՆՆԵՐ ԳՐԱԲԱՐԻ ԳՈՅԱԿԱՆԻ ԹՎԻ ԿԱՐԳՈՒՄ

Բանալի բառեր. թվակազմություն, թվի քերականական իմաստ, զուգաձևություն, մասնիկավորում, կրկնություն, համադրական կառուցատիպ, վերլուծական կառուցատիպ:

Ключевые слова: категория числа, грамматическое значение, множественное число, супплетивизм, аффиксация, удвоение, синтетичный тип, аналитичный тип.

Key words: category of number, grammatical meaning of number, plural, suppletivism, affixation, reduplication, synthetical model, analytical model.

Գոյականի թվի քերականական կարգը գրաբարում տարատեսակ դրսևորումներ ունի, որով պայմանավորված է թվակազմական զուգաձևությունների իրողությունը:

Ընդհանրապես, թվի քերականական կարգում զուգաձևության իրողությունը կարելի է ներկայացնել որոշակի խմբավորումով՝ ելնելով այն հանգամանքից, որ թվակազմական զուգաձևությունները տարբերվում են ինչպես քերականական իմաստների նրբերանգներով, այնպես էլ ձևակազմական գործոններով:

Լեզվական փաստերի ուսումնասիրությունը ցույց է տալիս, որ հին հայերենի գոյականի թվի քերականական կարգում դրսևորվող զուգաձևությունները պայմանավորված են մի շարք գործոններով, որոնցից կարելի է առանձնացնել *իմաստաբանական հիմունքը*,

հիմքակազմությունը, հոգնակերտ հոմանիշ մասնիկների գուգորդումը և այլն¹:

Գոյականի թվի քերականական կարգին բնորոշ մասնիկները իմաստաբանորեն միանշանակ հոգնակիակերտներ չեն. դրանց մի մասն արտահայտում է հոգնակիության, մյուս մասը՝ հավաքականության իմաստ, ինչպես՝ *եպիսկոպոսք - եպիսկոպոսունք, երեցք - երիցունք, նամակք - նամականի* և այլն²: Ըստ Հ. Պետրոսյանի՝ «Գրաբարում շատ քիչ է պատահում, երբ միևնույն հիմքը տարբեր հոգնակերտների հետ գուգորդվի: Սակայն հանդիպում են մասնավոր կազմավորումներ, երբ երկձև հոգնակի ունենք մի դեպքում բուն հոգնակերտով, մյուս դեպքում՝ «հավաքական» հոգնակերտով, թեև, իհարկե, դրանք գործածության հաճախականությամբ համարժեք չեն»³:

Թվակազմական գուգաձևությունները տարբերակվում են հիմքակազմության գործոնով, երբ թվակազմական մասնիկները գուգորդություն են կազմում հիմքերի տարբեր կառուցատիպերի հետ, ինչպես՝ *կոյսք // կուսանք, արմատք // արմատիք // արմտիք, աստեղունք // աստղունք, քոյրք // քորք* և այլն:

Ըստ էության, գոյականի թվակազմական մասնիկներն արտահայտում են հոմանշային հարաբերություն, հետևաբար նույն բառը կարող է ստանալ մեկից ավելի քերականական մասնիկներ հոգնակիության իմաստն արտահայտելու համար, ինչպես՝ *անք // անի. անուանք // անուանի, ք // ինք. գահք // գահինք, ք // եար // եր. բանք // բանեար // բաներ, ք // եան. բերդք // բերդեան, անի // այնի. աւագանի // աւագայնի, որայ // որեայ. արտորայ // արտորեայ* և այլն:

Թվի քերականական իմաստն արտահայտելու համար հայերենում հիմնականում գործում է մասնիկավորումը: Գրաբարում գոյականի հոգնակի թվի քերականական իմաստն արտահայտվում է նաև *արմատակրկնության* միջոցով: Այն դեպքում, երբ միևնույն քերականական իմաստն արտահայտվում է կրկնության և մասնիկավորման միջոցով, թվակազմական իմաստի դրսևորումը կարելի է անվանել *բառային-*

¹ Տե՛ս Ենգոյան Լ., Գոյականի թվակազմական գուգաձևությունները հին հայերենում (Խ.Աբովյանի անվան ՀՊՄՀ «Հայագիտական հանդես», № 2-3 (26-27), Ե., 2014, էջ 65-77):

² Հավաքականության իմաստ արտահայտող գրաբարյան հոգնակերտ մասնիկների մասին հանգամանորեն տե՛ս Ա. Բագրատունի, Հայերեն քերականություն ի պետս զարգացելոց, Վենետիկ, 1852, էջ 49: Ա. Աբրահամյան, Գրաբարի ձեռնարկ, Ե., 1976, էջ 20: Լ. Խաչատրյան, Գ. Թոսունյան, Գրաբարի դասագիրք, Ե., 2003, էջ 24-25:

³ Տե՛ս Հ. Պետրոսյան, Գոյականի թվի կարգը հայերենում, Ե., 1972, էջ 145:

մասնիկավոր գուգաձևություն: Զուգաձևության (զույգի) բաղադրիչների բնորոշման հարցում էական նշանակություն է ստանում նրանց արտահայտության պլանը:

Այսպես, *զունդ* բառի հոգնակի թվի համար գործածվում է *զունդ զունդ*՝ հարադրավոր բարդությունը, կամ *դաս* գոյականի հոգնակիի համար՝ *դասադաս* համադրական բարդությունը և այլն: Անշուշտ, վերոբերյալ զույգերը (զունդ զունդ // գուդք, դասադաս // դասք) թվակազմական գուգաձևություններ չեն, սակայն ակնհայտ է, որ դրանք արտահայտում են միևնույն՝ հոգնակիության քերականական իմաստը: Այս կարգի գուգորդումները թվակազմական *տարբերակներ* կարելի է համարել:

Գրաբարի մատենագրության մեջ հանդիպում են այս կարգի տարբերակներ ձևավորված արմատակրկնությամբ և արմատի ածանցական կազմությամբ. ուստի դրանց քննությունը որոշակի գաղափար կարող է տալ հին հայերենի թվակազմական գուգաձևությունների դրսևորումների վերաբերյալ:

Փորձենք ցույց տալ դրանց ձևակազմական յուրահատկություններն ու արտահայտած քերականական իմաստները 5-րդ դարի մակարդակում:

Մեր ընտրանքում եղած փաստական օրինակները թույլ են տալիս դրանք ներկայացնել որոշակի խմբավորումով, քանի որ այդ տարբերակների բառական եզրերը միևնույն ժամանակ ունեն կառուցվածքային տարբերություններ: Հիմք ընդունելով գուգաձևության բառական եզրերի ձևավորման յուրահատկությունները՝

այդ կարգի տարբերակների բաղադրիչները կարելի է բաժանել երկու խմբի՝ համադրական բարդություններ և վերլուծական բարդություններ:

ա) Տարբերակների մեկ եզրը համադրական կառուցատիպի բարդություն է:

Համադրական կրկնավոր բարդությունները թվի քերականական իմաստով համարժեք են բարդության արմատի ածանցական կազմությանը:

Այդ կարգի տարբերակները միմյանց նկատմամբ ցուցաբերում են հոմանշային հարաբերություններ՝ կազմելով թվակազմական տարբերակներ (զուգաձևություն): Համադրական կառուցատիպով հոգնակիի իմաստ են արտահայտում *գոյնագոյն*, *դասադաս*, *զունդազունդ* և այլ բարդություններ, որոնք քերականորեն համարժեք են իրենց արմատի ածանցական կազմություններին՝ *գոյնք*, *դասք* և *զունդք*:

Արմատակրկնությամբ կազմված *զունդազունդ* բարդությունն ունի «բազմամարդ, զունդ գնդի հետևից, գնդեր» իմաստներ, հմմտ. Ահաւասիկ ես ածից ի վերայ քո ... *զունդազունդ* հեծելովք ազգաց բազմաց յոյժ (Եզեկ., ԻԶ. 7):

Գունդը ածանցական կազմությունն ունի «գնդեր» իմաստը, հմմտ. Սոքա են *գունդը* ղեկտացոց (Թիւր., Գ. 21):

Դասադաս կրկնավոր բարդությունն ունի «դաս-դաս, խումբ-խումբ, խմբերով, տարբեր խմբեր» (հոգնակիության) իմաստ, հմմտ. Դարձեալ յիրաքանչիր ապարանիցն *դասադաս* մտանէին ի համաշխարհի խնդրուածս (Բ. Մակ., Գ. 18):

Դաս բառը հոգնակիակերտ –ք մասնիկով առնչվում է *դասադաս* կրկնավոր բարդության արտահայտած հոգնակիության իմաստին, հմմտ. Եւ հրամայէ զամբոխն ի բազում *դասս* որոշել, և ի վերայ իւրաքանչիւր դասուց զընտիրս ի ճարտարացն վարպետս կարգել (Խոր., 53):

Արմատակրկնությամբ կազմված *գոյնագոյն* բարդությունն ունի «գույնզգույն, բազմերանգ, տարբեր գույներ» նշանակություն, հմմտ. Եւ ի *գոյնագոյն* ծաղիկս պսակեալք ուրախութեամբ եւ ցնծութեամբ ... գոհանային զԱստուծոյ հարցն նոցա (Գ.Մակ. Է. 11):

Գոյն բառը հոգնակիակերտ –ք մասնիկով նույնպէս առնչվում է *գոյնագոյն* կրկնավոր բարդության արտահայտած հոգնակիության իմաստին, հմմտ. Ի նմանէ ծնեալ որդունս, ի զարդ կարմրատեսիլ *գունոց* (Փարպ., 10):

բ) *Տարբերակների մեկ եզրը վերլուծական կառուցատիպի բարդություն է:*

Այս կարգի զուգաձևությունների եզրեր են դառնում հետևյալ վերլուծական բարդությունները՝ *դաս դաս, գունդ գունդ, ազգ ազգի, (ի) տեղիս տեղիս* և այլն: Այս բարդություններն իրենց բառաքերականական իմաստով արտահայտում են հոգնակի թվի քերականական իմաստ. հոգնակիության իմաստի արտահայտման առումով այդ բառերին համարժեք են դրանց արմատական բաղադրիչների հոգնակիակերտ ածանցով կազմությունները: Հմմտ. *դաս դաս և դասք, գունդ գունդ և գունդք, ազգ ազգ և ազգք, (ի) տեղիս տեղիս և տեղիք:*

Դաս դաս վերլուծական բարդությունն արտահայտում է այն նույն իմաստը, ինչ համադրական կազմությունը՝ *դասադաս*: Հմմտ. Եւ բազմեցան *դասք դասք*, ուր հարեր եւ ուր յիսուն (Մարկ., Զ. 40):

Քերականական իմաստով նրան համարժեք է հոգնակիակերտ մասնիկով կազմությունը՝ *դասք*:

Գունդ գունդ վերլուծական բարդությունը գրաբարում գործածվում է *գունդս գունդս* ձևով՝ արտահայտելով հոգնակիության իմաստ, հմմտ. Եւ *գունդս գունդս* դարձեալ գումարէին ի նոցանէ յերկիր հեռաւոր (Եղ., 21):

Գունդ գունդս հարադրական բարդությունը քերականորեն համարժեք է հոգնակիակերտ ածանցով կազմությանը՝ *գունդք*:

Ազգ ազգ վերլուծական բարդությունն արտահայտում է հոգնակի թվի քերականական իմաստ՝ «տեսակ-տեսակ, տարբեր տեսակի» նշանակություններով, ինչպես՝ *Ջազգ ազգ* սերմանքն սերմանեն (ՆՀԲ, 1, 7):

Նույն իմաստն արտահայտվում է հոգնակիակերտ մասնիկով կազմությամբ՝ *ազգք*, հմմտ. Զիա ըդ միոյ միոյ ըստ իւրաքանչիւր *ազգաց* անուանս յօրինէր (Եզն., 68):

Ի տեղիս տեղիս վերլուծական բարդությունը «տարբեր տեղեր՝ կողմեր. տեղանք» նշանակությամբ արտահայտում է հոգնակի թվի իմաստ, ինչպես՝ Արքայ Անտիոքոս՝ կողմանցդ Եգիպտացւոց *ի տեղիս տեղիս*, առ սպարապետս եւ առ զաւրավարս, եւ առ զաւրս՝ ողջոյն (Գ. Մակ., Գ, 8):

Հոգնակի թվի իմաստով նրան համարժեք է *տեղի* («վայր, կողմ, սահման») արմատական բաղադրիչի հոգնակիակերտ մասնիկով կազմությունը՝ *տեղիք*: Հմմտ. Շինէ և յանապատ և յանմարդ *տեղիս* եղբայրանոցս և մենաստանս (Խոր., 280):

Այսպիսով, գոյականի թվի քերականական կարգում թվակազմական զուգաձևությունների քննությունը ցույց է տալիս, որ թվակազմական տարբերակները պայմանավորված են նաև ձևակազմական գործոններով:

Բառային-մասնիկավոր զուգաձևությունների քննությունը կարելի է շարունակել 5-րդ դարի մատենագիտական գործերի նոր փաստական նյութերի հիման վրա: Մեր ընտրանքում եղած օրինակների ուսումնասիրությունը հստակ ցույց է տալիս, որ լեզվական տվյալ գոյավիճակի սկզբնական շրջանում լեզվական այդ իրողությունը որոշակի դրսևորումներ ունի, որոնց շրջանակներում զուգաձևությունների կազմավորման գործոն է համարվում նաև դրանց եզրերի արտահայտության պլանը՝ բառային-կրկնավոր և մասնիկավոր կառուցատիպերով:

Բառային-մասնիկավոր զուգաձևությունները գոյականի թվի քերականական կարգում դիտվում են տարբերակներ (զուգաձևություններ) և ձևակազմական հատկանիշներով բնորոշվում են եզրերի արտահայտության պլանով (կրկնավոր բարդություն և հոգնակիակերտ մասնիկով բառաձև):

Օգտագործված գիտական գրականություն

1. Աբրահամյան Ա., Գրաբարի ձեռնարկ, Ե., 1976:
2. Ա. Բագրատունի, Հայերեն քերականութիւն ի պէտս զարգացելոց, Վենետիկ, 1852:
3. Ենգոյան Լ. Գոյականի թվակազմական զուգաձևությունները հին հայերենում (Խ.Աբովյանի անվան ՀՊՄՀ «Հայագիտական հանդես», № 2-3 (26-27), Ե., 2014, էջ 65-77):

-
4. Խաչատրյան Լ., Թոսունյան Գ., Գրաբարի դասագիրք, Ե., 2003:
 5. Պետրոսյան Հ., Գոյականի թվի կարգը հայերենում, Ե., 1972:

2. Համառոտագրություններ

Ա) Մատենագիտական երկեր և բառարաններ

Եզն . - Եզնկայ Կողբացոյ՝ Բագրեւանդայ՝ եպիսկոպոսոյ Եղծ աղանդոց, Վենետիկ,

1826:

Եղ. - Եղիշէի վարդապետի Վասն Վարդանայ եւ Հայոց պատերազմին, Ե.,

1957:

Խոբ. - Ս.Խորենացոյ Պատմութիւն Հայոց, Տփլիս, 1913:

ՆՀԲ - Նոր բառգիրք Հայկազեան լեզուի, հհ. Ա-Բ, Վենետիկ, 1836-1837:

Փարպ. - Ղ.Փարպեցոյ Պատմութիւն Հայոց, Տփլիս, 1904:

Բ) Աստվածաշունչ մատեան հին և նոր կտակարանաց
(Հայաստանի Աստվածաշնչային ընկերություն, Ե., 1997)

Եզեկ. - Եզեկիէլ:

Թիւք. - Թիւք:

Ա. Մակ. - Գիրք Մակաբայեցոց Ա:

Բ. Մակ. - Գիրք Մակաբայեցոց Բ:

Գ. Մակ. - Գիրք Մակաբայեցոց Գ:

Մարկ. - Աւետարան ըստ Մարկոսի:

Լ.Խաչատրյան, Լ.Ենգոյան

Բառային-մասնիկավոր գուգաձևություններ գրաբարի

գոյականի թվի կարգում

Անփոփում

Գրաբարում գոյականի թվակազմական գուգաձևությունները, ի թիվս այլ քերականական միջոցների, արտահայտվում են նաև *կրկնությամբ և մասնիկավորմամբ*: Բառային-մասնիկավոր գուգաձևությունների մի եզրում առկա են կրկնավոր բառեր, մյուսում՝ մասնիկավոր կազմություններ, ինչպես՝ *ազգ ազգ – ազգք, գունդագունդ– գունդք* և այլն: Բառային-մասնիկավոր գուգաձևություններում կրկնավոր բարդությունները հանդես են գալիս ինչպես վերլուծական, այնպես էլ համադրական կառուցատիպերով:

Л.Хачатрян, Л.Енгоян

**Лексико-аффиксальные супплетивизмы числа существительного
в древнеармянском языке**

Резюме

В древнеармянском языке супплетивизмы числа существительного, наряду с другими средствами, проявляются также при помощи удвоения /редупликации/ и аффиксации. Одним из компонентов супплетивизма такого рода является дупликативное слово, а другим – аффиксальное /ср: *ւոգոց ւոգոց – ւոգոցք, գոլնդւոգոլնդ- գոլնդք*/. В лексико-аффиксальных супплетивизмах удвоенные компоненты выступают как аналитическими, так и синтетическими структурными типами.

L.Khachatryan, L.Yengoyan

**Lexical and affixal suppletivism in the number category of nouns in Old
Armenian**

Summary

In Old Armenian, suppletivism in the category of number is being manifested by forms of reduplication and affixation. In these kinds of suppletivisms, one of the components is a word that is present, in the other, it's an affixal form / *ւոգոց ւոգոց – ւոգոցք, գոլնդւոգոլնդ- գոլնդք*/. In lexical and affixal suppletivisms, the reduplicated components are being expressed with analytical and/or synthetical models.